

von Wulf Wager

## *Dia Poscht mol wiedr ....*



Koin privatwirtschaftlicher Betrieb erhöht die Preise so hemmungslos wie 'd Poscht. Zom Johresa'fang hend se mol wieder erhöht. Weil mir emmr en Haufa Briefmarka brauchat, bschdellat mir des auf dr Website von dr Poscht em Internet.

Jetztatle hemmr letscht Woch hondert Briefmarka á 2,60 Euro bschdella wella, weil jo dr Großbrief nemme 2,40

sondern 2,60 koschtet. Also em Inernet guckt. Do allerdings bietet se ondr dr Rubrik "2,60" bloß Briefmarka für 2,40 a. Also hane bei dr Poscht a'grufa. Noch zehn (!) Minuta Warteschleife hane so a Schloifschell am Apparat ghet: Wo ich denn Briefmarka bschdella dät. "Ja uf eurer Website, wo denn sonscht?". "Lassen Sie mich mal schauen, das kenne ich garnicht...!" Mi hot schier dr Schlag troffa. No hot se mr d' Auskunft geba, dass koine 2,60 Briefmarka gibt. Mir sollat halt 2,40er und -,20er bschdella. I han denkt, i hör net recht ond han dia Tante gfrogt, seit wann se denn wissat, dass ab Januar des Porto erhöht wird, do hätt mr doch Briefmarka macha kenna?!?!? I han mr no ihren Vorgesetzta geba lassa. Noch weitere femf Minuta Warteschleife hot der mir no erklärt, dass es no keine 2,60er Briefmarka gibt, weil mr sich no net über's Motiv hätt einiga kenna.

Jongr Vaddr, en dr Privatwirstchaft wär der, der soebbes vrbockt, scho längscht am heggschda Boom ufghängt worde - sinnbildlich, versteht sich.

Aber des send halt emmr no Beamte, wo da Arsch net hochkriagat.

Arms Deutschland.

Bis näggschd Woch'

Ihr